

ANABI MUSA



The history of the prophet Moses in Illo Busa as recorded in the Ataula, in the second book of Moses: Exodus 1 - 20.

Bona

Musa takada piade

Īadana Isila'ilanɔwa Masa

Isila'ila pɔ an tà Masa kũ an mae Yakubudo, baapiki kũ a be gbẽnɔdo tɔn di: Lubainu, Saminu, Lawi, Yahuda, Isaka, Zabaluna, Biliaminu, Dã, Nafatali, Gada kũ Asiludo. Yakubu bui pinɔ piki gbẽn baakɔkwi. Yusufu sɔ a gĩake a ku Masa kò. Akũ Yusufu gà kũ a vīinanɔdo kũ a gɔɔ gbẽnɔdo piki. Isila'ilanɔ ne'ì an kò an lafà an dasikũ maamaa, an lì b̀usu pila.

Kia dufu pɔ ba Yusufu d̄so kpatabè Masa, akũ à ò a gbẽnɔne: À Isila'ilanɔ gwa, an dasikũ an liwala. Wà ge wà ãnɔkenné pɔ an su an lafao yãdi. Tó z̄ì s̀u à f̀ete, anda na wá ibeenɔwa, anda z̄ikawado, andí bute wá busuũ.

Akũ wà gbẽnɔ dinné an zɔdenɔ ù, an ĩadammá kũ z̄ì gbãado. Maka an Pitoũ kũ Lamesedo kàte Fili'aunane a pɔbenakakĩinɔ ù. Es̄o lapɔ wada ĩadammá leũ, maka andikũ lafa, andíkũ da gula, akũ bidi gè Masa gbẽnɔũ an yãdi. Akũ wà an dá z̄oz̄i pãsiũ, wà an pɔ yà, wà gĩboz̄i gbãa dänné kũ kũkũnabonado kũ bua z̄i pikido. Wà z̄i pinɔ dänné piki pãsipãsi.

Akū Masa kia Ibalani nɔgbɛ ne'innanɔ sɪsi, a do tɔn Sifila, a do Pua. À ònné: Tó a ne'ì Ibalani nɔgbɛnɔne sà, tó nɔgɔnae, à a de. Tó nɔgbɛe sɔ, à a tó. Esɔ nɔgbɛ pinɔ Lua vĩa vĩ, akū andi yā pɔ à ònné keo, andá nɔgɔnanɔ tó. Akū kia pì an sisi à an lá à ò: À kè laba a kè maka a nɔgɔnanɔ tòi? An wène an ò: Ibalani nɔgbɛnɔ ba de landɔ Masa nɔgbɛnɔbao, an wāa, andi ne'i ee wàkū ge mɔdi. Maka Isila'ilanɔ dá lafa, andá dasikū. Akū Lua maa kè nɔgbɛ ne'inna pinɔne, à an gbá nenɔ, pɔ an a vĩa vĩ yādi. Akū Fili'auna yā dì a gbɛnɔne piki à ò: À Ibalani netɛna pɔ de nɔgɔna ũnɔ ka Nilu íú piki, esɔ à ne nɔgbɛnɔ tó.

Musa ina

Lawi bui nɔgɔna Lawi bui nɔgbɛ sè. Nɔ pì nɔsì à ne'ì nɔgɔna ũ. Pɔ à è ne pì maa, à a ùte mɔ aakɔ. Pɔ i fɔ à a ùte dɔo, à wange kwando sè à kɔtaa lèwa, pɔ í su à gɛuo yādi. Akū à ne pì dàù à gèe à a dì Nilu dānaa vɔu. Ne pì vĩna nɔgbɛ ze zāu, ada gwa yā pɔ da su à a le.

Fili'auna nenɔgbɛ gèe zu'odi swa'íú, akū a gbɛnɔ dá bebe swa ilewa. À kwando è dina vɔu, akū à a zíkenna zì, à gèe à sè. Pɔ à gò, à è né mí daũ, ada ɔɔɔ. À kène wewɛnda à ò: Ibalani nenɔgɔnae. Akū ne pì vĩna mɔ à ò Fili'auna né pine: N yidi mà ge mà Ibalani nɔgbɛ sisinne àkū yɔkpanne ne piwa ya? À wène à ò: Ao, ge! Akū nɔkɔna pì gèe à ne pì da sɪsi. Fili'auna nenɔgbɛ pì òne: Ne pì se n tado, ndí a gwamea, mí fĩabonne. Akū à ne pì sè à tado, ada a gwa. Pɔ ne pì zɔkɔkù, à a sè à gèedo Fili'auna

nenɔgbɛ pine, akū à a sɪ a né ũ. À tɔkpàne Musa, zaapo à ò akū a bò íú.

Musa basi à tà Midiã

Zíkezi pɔ Musa zɔkɔkū, à gèe a bui Ibalaninɔ gwadi, akū à zĩ gbāa pɔ andá ke è. À è Masa gbɛ dá a bui gbɛ. Pɔ à gu gwàgwa, i gbɛke eo, akū à Masa gbɛ pì dè à v̄ite busunkonaũ.

Pɔ gu sùka à dò, à bò, à Ibalaninɔ è gbɛn pia, andá feteke. Akū à gbɛ pɔ a yā nnao là à ò: Bɔyādi nda n gbɛdo gbɛi? À wène à ò: Dí mí n di wá kia ũ pɔ nda yākpatekewadoi? N̄ yidi n ma de lapɔ n Masa gbɛ pì dèba ya? Akū v̄ia Musa kū à ò: Wà yā di d̄ɛ fa!

Pɔ Fili'auna yā pì mà, ada wete à Musa de, akū à ba sɪne à tà Midiã busuũ, à z̄ite lɔgɔ sɛe gū. Midiã sa'onke ku, a nenɔgbɛno v̄i gbɛn soopia, akū an m̀ an í t̀ an kà tibɔnɔ imibɔũ an mae tibɔnɔne. Pɔ sādān kenɔ m̀ anda an ya, akū Musa f̄ete à yā sɪ kū nɔgbɛ pinɔdo, akū à í kpàñne an tibɔnɔwa. Pɔ an tà an mae Lɛweliwa, à an lá à ò: À kè laba a su kaaku gbāai? An wène an ò: Masa nɔgɔnke mí wá si sādānnanɔwa. Baa fe akū mí í t̀ an kpàwɛa wá tibɔnɔwa. Akū à an lá à ò: A ku má ni? Bɔyādi a nɔgɔna pì t̀ gūi? À a sisi à m̀ à pɔbewado. Musa m̀, akū à wè à z̄ite kū nɔgɔna pido, akū nɔgɔna pì a nenɔgbɛ Zipola kpàwa. À n̄i nɔgɔna ũ, akū Musa tɔkpàne Geesomu, à ò bommɔn akū ũ dakɔnɔ busuũ la.

Pɔ à gikè, akū Masa kia gà. Isila'ilano dá ũ'ũa ke zɔzĩ pɔ andá ke yãdi, andá wikipɛ, akū an wiki pì kà Luawa. À an ũ'ũnakena mà, mí a í pɔ ku kũ Bulaimado kũ Isiakado kũ Yakubudo di sãsauo. Lua Isila'ilano gwà, akū à an wewēnda gwà.

Lua Musa sisina

Musa dá a ãnzue Midiã b̀usu sa'onna tibɔnɔ d́, à b̀ua gugbangbewa ee à kà gbesĩsĩ pɔ wì o Holebu kĩa. Akū Deke Malaika b̀ò à m̀wa tefuaũ lè liũ. Musa lè pì gwà, à è te d̀wa, esõ ada te kũo. Akū à ò: Maa ge yãdonadona pì gwadi, mí pɔ pɔ tò lè pì dá te kũo dõ. Pɔ Deke è à m̀ gwadi, akū à lez̀udi zaa lè lí piũ à ò: Musa! Musa! Akū à wène à ò: Má di! Lua òne: Su ñ na ma s̄eo. Ñ n kete bute, zaapɔ gu pɔ ñ ze donae. Akū à ò: Maakū mí n dezinɔ Bulaima kũ Isiakado kũ Yakubudo Lua ũ. Akū Musa ɔ̀tà a wele, pɔ a wesina Luale vĩa vĩa yãdi. Akū Deke ò: Ma takasi pɔ ma gbẽnɔ dá ke Masa è, mí ma wiki pɔ an ãadammadenɔ tò andá pé mà. Má an ãa dõ. A yã mí tò ma pita mà an si Masa gbẽnɔwa, mí an bute b̀usu piũ, mí geĩdo b̀usu taakide yaasaũ, gu pɔ vĩa kũ zɔ'ido dasi, b̀usu pɔ Kanaanɔ ku kũ Hitinɔdo kũ Amolinɔdo kũ Pelizinɔdo kũ Hivinɔdo kũ Yebusinɔdo. Isila'ilano wikipena ma le sà, mí ma wet̄ea pɔ Masa gbẽnɔ dá m̀onné è. Ge sà, ma n zĩ Fili'aunawa, pɔ ñ ma gbẽ Isila'ilano bute Masa. Akū Musa ò Luane: Din ma ũ pɔ mà ge Fili'aunawa mà Isila'ilano bute Masai? Lua òne: Maakū kundo.

Zīna pɔ ma n zī seedan di: Tó n an bute Masa, áa ma sisi gbesīšī di pɔtēũ.

Akū Musa ò Luane: Tó ma gɛɛ ma ò Isila'ılanɔne ma ò an dezinɔ Lua mí ma zīmmá, tó an ma la n tɔdi, laba maa onnéi? Lua wène à ò: Maakū mí ma ũ. Onné maakū mí à n zīmmá. Lua òne dɔ: O Isila'ılanɔne Deke an dezinɔ Bulaima kū Isiakado kū Yakubudo Lua à n zīmmá. Ma tɔn nu gɔɔkepiki. Akū ma sisi maka ee á buiwa. Gɛ ò Isila'ila gbē zɔkɔnɔ kakaa, ndí onné ma Deke an dezinɔ Bulaima kū Isiakado kū Yakubudo Lua ma bo ma mɔmma. Onné máda an e, ma yā pɔ wada kenné Masa è. Maa an bute Masa, gu pɔ andá takasi ke pì, mí gɛndo bùsu pɔ Kanaanɔ ku kū Hitinɔdo kū Amɔlinɔdo kū Pelizinɔdo kū Hivinɔdo kū Yebusinɔdo, gu pɔ vī kū zɔ'ido dasi. Anda n yā ma. Mɔkɔn kū Isila'ila gbē zɔkɔnɔdo à ge à Masa kia le, í one ma Deke Ibalaninɔ Lua maakū mí ma bo ma mɔawa, ma ò à á gba zé à ge gɔɔ aakɔ kedi gugbangbēũ, pɔ à le à sa'o maakū ma Deke á Luawa. Má dɔ Masa kia da we à gɛo, sema ma gá dɔwa baasio. Maa ɔtɔ Masa gbēnɔwa, mí yādonadonanɔ ke mà kpadońdi, i basa à á gbɛɛ. Maa tó Masa gbēnɔ an á wɛ gwa, pɔ tó áda tá, áa ta ɔgiio. Á nɔgbē piki suluba kó zīnali nɔmaabebɔnɔ kū pɔkasanɔdo wobi ke a Masa nɔgbē dakewa kū an nɔgbē pɔ ku a bewanɔdo, í da á nenɔgɔnnanɔne kū á nenɔgbēnɔdo. Maka áa Masa gbēnɔ pɔnɔ simmá bugubugu.

Lua Musa gbana dabodabokena zé

Musa wène à ò: Tó andi ma naaíkeo, mí andi ma yā mao, tó an ò mǎkǒn mí ndi bo n mǎmao sǎ bi? Akū Deke a là à ò: Bó ní kūna gūi? À wène à ò: Gòe. Deke òne: Pātē zīte. Pǎ à pātē, akū à lì mē ũ, akū Musa bò kpe. Akū Deke òne: Obo n à kū a víawa. Pǎ à a kū, akū à sùka à gǎ gò ũ a zǎ. Deke òne: Maka nda ke, anda we ma Deke an dezinǎ Bulaima kū Isiakado kū Yakubudo Lua maakū mí bò ma mǎmma.

Deke sùka à òne dǎ: Nǎ ǎ sǎtǎ n utaū. Akū à sǎtǎ. Pǎ à bò, à è a ǎ kusu kū, à kè puu landǎ bu'uba. Deke òne: Suka nǎ ǎ sǎtǎ n utaū. À sùka à sǎtǎ. Pǎ à bò, à è à sù a gbēū. Deke òne: Tó andi n naaíke an wè seeda kaakudio, anda we a zādi pǎdi. Tó andi we seeda pia pinǎdi an an yā mǎo sǎ, Nilu í tǎ n kǎte tǎtewa, àa li au ũ.

Akū Musa òne: O'o Deke! Zaa zi yā'o ba faa madoo. Baa zaa gǎo pǎ n yā'òmea, ma lé gbiae. Akū Deke òne: Dí mí le dǎ gbēnesīnanei? Dí mí dǎ a nena nate kó ì to à swato kūi? Dí mí dǎ to à gu e kó ì to à vīakūi? Maakūe Deke, maakūndoo de? Ge sà! Maa n gaake kū yā'odo, maa yā pǎ nda o danne. Akū à ò: O'o Deke! N yā nna! Gbēke zǎ. Akū Deke pǎ pà Musadi à ò: N vīna Haluna Lawi bui ba kuo de? Má dǎ pǎ yā'o ba zǎidoo. Ada mǎ dadinle. Tó à wesinle, a pǎ da ke nna. Yā odo, ndí yā pǎ à su à o dane. Maakū, maa á gaake kū yā'onado, míkū yā pǎ á su à ke daane. Àa yā'o gbēnǎne n gēe ũ, àakū de n lé ũ, mí ndakū dene Lua ũ. Gò di se òkū kūna, ndí seedanǎ kedo.

Musa sukana Masa

Musa tà a ãnzue Yetolowa, à òne: Ma gba zé mà ta ma gbě̀nɔ kĩa Masa, mà e tó an ku undedo ee tia. Yetolo òne: Ka aafia. À m̀̀ à lè Deke ò Musanɛ Midiã busuũ: Fete ò ta Masa, zaapɔ gbě̀ pɔ andá n wete an n de yãanɔ gàga piki. Akũ Musa a na sè kũ a nenɔgɔna pinɔdo, à an dí faaganɔ musu, à sùka ada tá Masa, a Lua gò pì kũna. Akũ Deke òne: Tó n ka Masa, yãdonadona pɔ ma a iko kpàmmanɔ ke Fili'auna wewa piki. Esɔ maa a swa fẽne, i gi gbě̀nɔ gbɛedi. Ndí onɛ ma Deke ma ò Isila'ila mí ma nenɔgɔn kaaku ù, akũ ma òne à ma nenɔgɔn kaaku pì gbɛɛ à gɛ à zɔbemɛa. To à gí a gbɛedi, maa a nenɔgɔn kaaku de sũ.

Musa dá i zeũ guke, akũ Deke a lè gũ, a yidi à a de. Akũ Zipola gbè fèna sè à a né tɔzɔ̀do, à a tɔbaa nà Musa gbáwa à ò: Sĩanaɛ, m̀̀kɔn ma zá au pɔ ù. Tɔzɔ̀na bee yãdi à ò, zá au pɔ. Akũ Deke Musa to.

Deke ò Halunanɛ: Gɛ dadi Musale gugbangbeũ. Akũ à gèɛ à a lè Lua gbesĩsĩ kĩa, à lepèwa. Musa yã pɔ Deke a zĩ odi d̀̀do Halunanɛ kũ seeda pɔ à òne à kenɔdo. Akũ Musa kũ Halunado tà Masa an Isila'ila gbě̀ zɔkɔ̀nɔ kàkaa. Haluna yã pɔ Deke ò Musanɛ d̀̀dɔnné piki, akũ Musa yãdonadona pinɔ kè Isila'ilanɔ wewa. An wè yã pido. Pɔ an mà Deke mí m̀̀ an gwadi à an takasikena è, akũ an kùtene an mi pète.

Musa kũ Halunado gena Fili'auna gwadi

Bee kpe Musa kũ Halunado gèe an Fili'auna lè an òne: Yã pɔ Deke Isila'ilanɔ Lua òn di: À ò ò ò akũ gbẽnɔ gbɛe an ge an dikpe keakũne gugbangbeũ. Fili'auna wènné à ò: Din Deke ũ pɔ mà mikutene, mí Isila'ilanɔ gbɛei? Maba Deke dõo. Maa Isila'ilanɔ gbɛeo. Akũ an òne: Ibalaninɔ Lua mí bò à mðwá. Wá gba zé wà ge gɔɔ aakɔ kedi gugbangbeũ, wí sa'o Deke wá Lua piwa, pɔ a su à gagyã kawaũo kó zíkana. Akũ Masa kia pì ò Musane kũ Halunado: À kè laba a tò gbẽnɔ laakai dá go an zĩwai? À suka á zĩwa. Akũ à sũka à ò: Pɔ gbẽnɔ dasikũ sà, akũ á yidi an kãmabo kũ an zĩdo ya?

Zĩbeezĩ Fili'auna yã dì Isila'ila ïadammadenɔne kũ an gẽn'eedenɔdo à ò: Á su àdi bũsã kparamá an kũkũnabodo lapɔ i ke yãaba dɔo. Andadi ge an pɔ kedi an gĩnane. Esɔ andí kũkũna bo a lé gbeũ lapɔ andi bo ziba. Á su à labonnéo, zaapo ma'ãdenɔe. A yã mí tò an wiki dɔ, andá o an yidi an ge sa'odi an Luawa. À zĩ lafanné, pɔ an su an kãmabokĩ e an laakaidɔ eke yãnwa dɔo.

Akũ an ïadammade pinɔ kũ an gẽn'eedenɔdo m̀ an ònné: Fili'auna ò akũda bũsã kpaawa dɔo. À ge à sete á gĩna gu pɔ áa e. Esɔ wáa zĩ laboaneo, baa yɔnkɔn. Akũ an fãakã an gèe Masa gukepikiũ sêkedi bũsã ũ. An ïadammade pinɔ dikũ nakemá lapɔ gu dá dɔ, pɔ andadi an zĩ laka, lapɔ andi laka gɔɔ pɔ wì bũsã kparamáwa. Wà gbẽna kè Isila'ila gẽn'eedenɔ pɔ an ïadammadenɔ an dinɔne, wà ònné: À kè laba i kũkũna bo gbãa

kó gīa, à kà lapɔ wà a lé daane yāawao ni? Akū Isila'ila gēn'eedenɔ gèe an wikipè Fili'aunawa an ò: À kè laba nda ke waakūnɔ n zɔbennanɔne makai? Wada būsā kpaawa dɔo, mí wada o wà kūkūna bo. Wada wá gbě, esɔ n gbēnɔ mí taali vī. Akū à ò: Ma'ādenɔn á ũ. Maka a bedo! A yādi ikū o áa ge sa'odi Dekewaε. À ge zīkedi. Wàa būsā kpaawa dɔo, esɔ áadi kūkūna bo lapɔ wà daane leū.

Pɔ wà ò Isila'ila dɔn'eedenɔne an su an gɔɔ do kūkūnabona laboo, an dṣ̄ pɔ an yā è sà. Pɔ an bò Fili'auna kīa, an kpākī kū Musado kū Halunado, andá an dá, akū an ònné: Deke á yā gwa, i yākpatekeado, zaapɔ a tò Fili'auna kū a gbēnɔdo amba yi wá gbī yādio. A wá dena zé kpàmmá. Akū Musa sùka à gèe à ò Dekene: Deke, bɔyādi n ĩadà gbě pinɔwai? Bee yādi n ma zī ya? Zaa gɔɔ pɔ ma gèe ma yā'ò Fili'aunanε kū n tɔdo, akū ada ĩada n gbēnɔwa, mí ndi an boo!

Deke Isila'ilanɔ suabana ledina Musane

Akū Deke òne: Nda yā pɔ maa ke Fili'aunanε e tia. Àa an gbèe ma gbāa zōkō yādi. Àa an ya a busuū ma gbāa zōkō yādi. Akū Lua sùka à yā'ò Musane à ò: Maakū Deke, ma bo ma mɔ Bulaima kū Isiakado kū Yakubudowa Lua Gbāapikide ũ, esɔ andi ma dṣ̄ ma tɔ Dekewao. Ma í kuńdo ma ò maa Kanaa būsɔ pɔ an ku nibɔnɔ ũ kpammá. Ma Isila'ilanɔ ũ'ūnakena mà an zɔbena Masa gbēnɔne yādi, mí ma í pɔ kuńdo pì i sāsāmaño. A yā mí tò o Isila'ilanɔne Maakū Deke, maa an bo zī gbāa pɔ Masa gbēnɔ an dàū, mí an suaba. Maa yākekeńdo, mí an bo kū ma

ɔgāsī gbāado. Maa an se ma gbēno ũ, míkū de an Lua ũ, andíkū dǎ maakūe Deke an Lua pɔ an bo Masa zī gbāaũ. Maa geńdo b̀usu pɔ ma a ledà Bulaimaneũ kũ Isiakado kũ Yakubudo. Maa an gba ankũ vī. Maakūe Deke.

Musa yā pì ò Isila'ilanɔne, esǎ andi a yā mao, pɔ zɔzī pāsī an kã dè yādi. Akũ Deke ò Musane à ò: Ge ò o Masa kia Fili'aunane à Isila'ilanɔ gbɛɛ an bute a busuũ. Akũ Musa wè Dekewa à ò: Lapɔ Isila'ilanɔ dí ma yā mao, ma gbē pɔ ma lé gbia, laba Fili'auna da ma yā mai?

Musa kũ Halunado buibokĩ

Deke yā'ò Musane kũ Halunado Isila'ilanɔ kũ Masa kiado yā musu, à ònné an bute kũ Isila'ilanɔdo Masa. An bui ɔũdenɔ tɔn di: Isila'ila nenɔgɔna kaaku Lubainu nɔgɔnanɔn di: Anɔki, Palu, Ezɔnɔ kũ Kaamido. Lubainu buinɔn nu. Saminu nɔgɔnanɔn di: Yemuɛ, Yamini, Oada, Yakē, Zohaa kũ Kanaa nɔgbē né Sauludo. Saminu buinɔn nu. Lawi nenɔgɔnanɔ tɔn di an buiwa: Geesǎ, Kohata Kũ Melalido. Lawi kè wè basoodokwi kũ sopiadoe (). Geesǎ nɔgɔnanɔn di an buiwa: Libini kũ Simaido. Kohata nenɔgɔnanɔ tɔn di: Amalamu, Izaa, Hebeloni, Uzieli. Kohata kè wè basoodokwi kũ aakɔdo (). Melali nɔgɔnanɔn Mali kũ Musido ũ. Lawi buinɔn nu danɛdane.

Amalamu a mae dakũna Yokabedi sè na ũ, akũ à Haluna kũ Musado ìdo. Amalamu kè wè basoodokwi kũ soopiado (). Izaa nɔgɔnanɔn Kola kũ Nefegido kũ Zikilido ũ. Uzieli

nɔgɔnanɔn Misaeli kũ Elezafãdo kũ Sitalido ũ. Haluna Aminadabu né Eliseba, Nasɔ dakũna sè na ũ, akũ à Nadabu kũ Abihudo kũ Elezaado kũ Itamaado ìdo. Kola nɔgɔnanɔn Asi kũ Elikanado kũ Abiasafado ũ. Kola buinɔn nu. Haluna né Elezaa Putieli nenɔgbẽnɔ do sè na ũ, akũ à Finehasi ìdo. Lawi bui ɔũdenɔn nu danɛdane.

Haluna kũ Musa pɔ Deke ònné an Isila'ilanɔ bute Masan nu gãagãa. Ankũnɔ mí yã'ò Masa kia Fili'aunane, pɔ an le an Isila'ilanɔ bute Masa. Pɔ Deke yã'ò Musane Masa, à ò akũ Deke, yã pɔ akũda onɛ à o Fili'aunane piki. Akũ Musa ònɛ a lé gbiaɛ, laba Fili'auna da a yã mai?

Muse men kwi kpana Masa gbẽnɔdi

Akũ Deke ò Musane: Gwa! Ma n ke Fili'aunane landɔ maba, akũ n vĩna Haluna de n lé ũ. Yã pɔ ma ònne piki o n vĩna Halunane, i o Fili'aunane à Isila'ilanɔ gbɛɛ an bute a busuũ. Baa kũ beedo maa a swa fẽne. Maa seedanɔ kũ yãdonadonanɔdo ke Masa dasi, esɔ Fili'auna da á yã mao. Maa ɔtɔ Masa gbẽnɔwa, mí yãkɛkɛndo, mí bo kũ ma zĩkanna ma gbɛ Isila'ilanɔdo. Tó ma bo kũ ma gbãado Masa, maa Isila'ilanɔ buteũ, Masa gbẽnɔ dí dɔ sà maakũe Deke. Akũ Musa kũ Halunado kè lapɔ Deke ònnéba. Gɔɔ pɔ an yã'ò Fili'aunane, Musa wè basiikɔ, Haluna sɔ wè basiikɔ kũ aakɔdo.

Akũ Deke ò Musane kũ Halunado: Tó Fili'auna yãdonadona làmma, o Halunane à a gò se à pãtɛ a ɛɛ, i li mɛɛ ũ.

Pɔ Musa kũ Halunado gèe Fili'auna kĩa, an kè lapɔ Deke ònnéba. Haluna a gò sè à pàtè Fili'auna kũ a ibaanɔdo εε, akũ à li mεε ũ. Akũ Fili'auna Masa wezēnnanɔ kũ ezedenɔdo sisi, akũ an yādonadona pì kè maka sō an ezedekenaũ. Pɔ an baapiki a gò pàtè, akũ an gò pinɔ li mεenɔ ũ sō, akũ Haluna gò an gònɔ mòmɔ. Fili'auna swá gbāa, i an yā mao lapɔ Deke òba.

Inɔ lina au ũ

Deke ò Musane: Fili'auna swá gbāa, à gì gbēnɔ gbædi. Ge ò a le zia kɔnkɔ, gɔɔ pɔ ada ge swai, ndíkũ a dā Nilu lɛwa gũ. Nkũ n gò pɔ li mεε ũ pì kũna, ndí onε ma Deke Ibalaninɔ Lua maakũ mí ma n zīwa ò onε à ma gbēnɔ gbεε an ge zɔbedimeεa gugbangbeũ, esō ee tia i mao. Ma Deke ma ò, yā pɔ da to à dō maakũε Deken di: Tó n Nilu í lè kũ gò pɔ n kũnado, àa li au ũ. Kpɔ pɔ ku í piũnɔ dí gaga, Nilu í dí gbĩ ke, Masa gbēnɔ dí fu à mi.

Akũ Deke sùka à ò Musane: O Halunane à a gò se à do Masa ila, an swanɔ kũ an swa'ɔnenɔdo kũ an bianɔdo kũ an ikakĩinɔdo piki, andí gō au ũ. Au díkũ dana gula Masa, baa an pēn inɔ kũ an ɔnda inɔdo piki.

Akũ Musa kũ Halunado kè lapɔ Deke ònnéba. Haluna a gò pì sè à Nilu í lèdo Fili'auna kũ a ibaanɔdo wewa, akũ í pì gō au ũ piki. Kpɔ pɔ kuũnɔ gāga, akũ Nilu í pì gbĩ kè, Masa gbēnɔ fù à mi. Au dana gula Masa. Masa ezedenɔ kè maka sō an ezedekenaũ, akũ Fili'auna swá gbāakũ, i an yā mao lapɔ Deke

òba. Fili'auna sùka à tà a bewa, i yā pì ka feo. Masa gbě̀nɔ bia ỵỵ̃ Nilu lewa, pɔ wà le wà imi, zaapɔ andi f̃s an swada í mio. A ku maka ee gɔɔ soopia Deke Nilu lena kpe.

Biɔɔnɔ kanaú

Akū Deke ò Musane: Ge ò o Fili'aunanɛ, maakū Deke ma ò à ma gbě̀nɔ gbɛɛ an ge an zɔbemea. Tó à gì an gbɛɛdi s̃, maa tó biɔɔnɔ ka a busuū gukepikiū. Biɔɔnɔ da Nilu pa ee an bua s̃s̃iwa, andí gē a ɔūu ee a kpe'ɛɛū, andí dede a wutebɔwa. Andí gē a ibaanɔ ɔūnɔū kū a gbě̀nɔ ɔūnɔdo. Andí ka a kīinɔū kū a pɔbebɔnɔdo. Biɔɔnɔ da dedewa kū a gbě̀nɔdo kū a ibaanɔdo piki.

Deke sùka à ò Musane: O Halunanɛ à a gò se à dɔ swanɔla kū swa'ɔnenɔdo kū bianɔdo, biɔɔnɔ dí ká Masa busuū. Pɔ Haluna a gò dè Masa inɔla, akū biɔɔnɔ b̃ute an l̃i b̃usu pila. Akū ezede pinɔ kè maka s̃ an ezedekenaū, an tò biɔɔnɔ dà Masala.

Akū Fili'auna Musa kū Halunado sisi à ò: À kute kpa Dekene à biɔɔnɔ kēma kū ma gbě̀nɔdo, mí á gbě̀nɔ gbɛɛ an ge sa'odiwa. Akū Musa ò Fili'aunanɛ: Gɔɔ dimea mà kute kpanne Dekene kū n ibaanɔdo kū n gbě̀nɔdo, pɔ à biɔɔnɔ kēmma kū n ɔūnɔdo, andí g̃s swa pì iū a do. Fili'auna ò: Zia. Akū Musa ò: Àa ke lapɔ n òba pɔ ò le ò d̃s gbě̀ke mukā kū Deke wá Luadoo. Biɔɔnɔ dí kēmma kū n ɔūnɔdo kū n ibaanɔdo kū n gbě̀nɔdo, andí g̃s swa pì iū a do.

Pɔ Musa kū Halunado b̃ò Fili'auna kīa, Musa wobikè Dekewa biɔɔ pɔ an kà Fili'aunaūnɔ yā musu. Deke Musa

wobikena mà, akū biɔɔ pinɔ gàga kpenɔũ kũ ɔũnɔdo kũ bæe kpenɔdo. Wà kàkaakakaa, akū bùsu gbĩ kè piki. Pɔ Fili'auna è wà kè sãa, a swá sùka à gbãakù, akū i Musa kũ Halunado yã mao lapɔ Deke òba.

Sàanɔ kanaú

Deke ò Musane: O Halunane à a gò se, i tɔɔte lèdo, busuti dí li sàanɔ ù Masa gukepikiũ. Akū an kè maka. Haluna a gò sè à tɔɔte lèdo, akū busuti li sàanɔ ù, an kà gbēnesīnanɔũ kũ nɔbɔnɔdo. Masa busuti li sàanɔ ù piki. Ezedenɔ yɔ̀wa maka an ezedekenaũ sɔ, akū an fùa. Sàanɔ kà gbēnesīnanɔũ kũ nɔbɔnɔdo. Akū ezedenɔ ò Fili'aunane: Lua ɔgbæe. Piki kũ dido Fili'auna swá gí à gbãa, i an yã mao lapɔ Deke òba.

Ifīnanɔ kanaú

Deke ò Musane: Fete kɔnkɔkɔnkɔ ñ ge ñ Fili'auna le gɔɔ pɔ ada ge swawa, ndí one ma Deke ma ò à ma gbēnɔ gbæe an ge an ɔɔbemea. Tó à gí an gbæedi, maa ifīnanɔ kaũ kũ a ibaanɔdo kũ a gbēnɔdo kũ a be kpenɔdo. Masa kpenɔ dí pa kũ ifīnanɔdo, anda da tɔɔtewa fe. Gɔɔ bee Gosē bùsu gu pɔ ma gbēnɔ ku an maa bo a do. Gũ ifīnanɔ da kaũo, pɔ à le à dɔ maakūe Deke a busuũ. Má ma gbēnɔ dɔ kōne kũ a gbēnɔdo. Zia an seeda pì da ke.

Akū Deke kè maka. Ifīnanɔ kà Fili'auna ɔũu kũ a ibaanɔ ɔũnɔdo. Masa yɔ̀kpà piki ifīnanɔ yãdi. Akū Fili'auna Musa kũ Halunado sisi à ò: À ge à sa'o á Luawa busuũ la. Akū Musa òne: Aba zé vī wà ke makao, zaapɔ pɔ pɔ wáa sa'odo Deke wá Luawa

de Masa gbēnɔne tē ũ. Tó wa sa'ò kũ pɔ pɔ denné tē ũdo an wewa, anda wá papa kũ gbèdo an wá dedeo de? Wáa ta'o gugbangbeũ gɔɔ aakɔ, wí basa wà sa'o Deke wá Luawa lapɔ à òwēaba. Akũ Fili'auna ò: Maa á gbɛɛ à ge à sa'o Deke á Luawa gugbangbeũ, esɔ́ á su à ge zāuo. À wabi kemɛa sà. Musa òne: Tó ma ta, maa kute kpane, i ifinanɔ kēmma zia kũ n ibaanɔdo kũ n gbēnɔdo. Esɔ́ su ò munafiki ke ò gi gbēnɔne an ge an sa'o Dekewa dɔɔ. Pɔ Musa bò Fili'auna kĩa, à kutɛkpàne Dekewa. Deke a wobikena mà, akũ ifinanɔ kē Fili'aunawa kũ a ibaanɔdo kũ a gbēnɔdo. Andi gɔ́ gukeo, baa mendo. Baa kũ beedo Fili'auna swá gí à gbāa ee tia, i an gbɛɛo.

Tibɔnɔ gagana

Deke ò Musane: Ge ò Fili'auna le, ndí one Deke á Ibalaninɔ Lua ò, à ma gbēnɔ gbɛɛ an ge an zɔbɛɛa. Tó à gí an gbɛedi mí a an kũna ee tia, maa ɔtɔ́ a tibɔnɔwa bua. Maa gagyã pāsĩ ka a sɔnɔũ kũ a faaganɔdo kũ a yangonɔdo kũ a zunɔdo kũ a sãnɔdo kũ a benɔdo. Maa Isila'ila tibɔnɔ dɔ́ kɔne kũ Masa gbēnɔ tibɔnɔdo. Isila'ilanɔ tibo kan da gao. Ma Deke ma a gɔɔ di. Zia maa bee ke busuĩ la.

Pɔ gu d̀, akũ Deke kè maka. Masa tibɔnɔ gàga piki, esɔ́ Isila'ilanɔ tibo kan di gao. Fili'auna yã pɔ kè pì là à mà Isila'ilanɔ tibo kan di gao, esɔ́ a swá gí à gbāa, i gbē pinɔ gbɛɛo.

Sebo kana Masa gbēnōũ

Deke ò Musanē kũ Halunado: À mɔgatekpe tubu ɔkutu kpa, Musa dí fã musu Fili'auna wewa, i da Masa busula piki landõ lugutēba, i ka gbēnesīnanōũ kũ tibōnodo sebo ũ gukepikiũ. Akũ an mɔgatekpe tubu sètē an gèedo Fili'auna kĩa. Pɔ Musa tubu pì fã musu, akũ à kà gbēnesīnanōũ kũ tibōnodo sebo ũ. Ezedenɔ di fõ an gèe Musa kĩa sebo pinɔ yãdi, zaapɔ à an lé kũ Masa gbēnodo piki. Akũ Deke Fili'auna swa fẽ lapɔ à ò Musanēba, akũ i an yã mao.

Legũgbe kwena

Deke ò Musanē: Fete kɔnkɔkɔnkɔ òn gē òn Fili'auna le, ndí onē ma Deke á Ibalaninɔ Lua ma ò, à ma gbēnɔ gbēe an gē an ɔɔbemea. Didi sà maa ïadamma bui piki dawa kũ a ibaanodo kũ a gbēnodo, pɔ à le à dõ ānuau piki gbēke ba mukāmadoo. Zaapɔ tó ma ɔbò ma gagyã kàú yãa, dà akũ kũ a gbēnodo an làka ānuau. Ma tò à ku pɔ à ma gbãa e, ma tɔ dí da ānuala piki. Lapɔ ada a gĩna sē lezĩ de ma gbēnɔla ee tia, ada an gbēe, zia makaa'i maa tó legũgbe pāsĩ kwe maamaa, legũgbe pɔ a taka di ke Masa yãao zaa wà kàte ee mɔna gbãa. Onē à gbēnɔ zĩ an a tibōnɔ kũ pɔ pɔ a vĩ buanodo sete à kaka kpu piki. Gbēnesīnanɔ kũ pɔ pɔ ku baasinɔ, tó wì gēndo kpuo, legũgbe da kwemmá anda gaga.

Fili'auna ibaa kenɔ vĩakè Deke yānē, an an zĩkennanɔ kũ ñ tibōnodo kàka kpu. Esõ gbē pɔ andi Deke yã kaonɔ, an an zĩkennanɔ kũ an tibōnodo tò baasi. Akũ Deke ò Musanē: Ɔ sē

musu, legūgbe dí kwé gbēnesīnanɔwa kũ tibɔnɔdo kũ bua pɔnɔdo Masa busuĩ piki. Pɔ Musa a gò dɔ̀ musu, Deke tò legū dá pūtā, ada ma kũ gbèdo, ada yēmeke, mí lua dá pata tɔtewa. Deke legūgbe kà Masa gbēnɔũ. Legūgbe dá kwe, legū dá yēme keke. Legūgbe pì pāsī. Zaa Masa b̀usu ku, legū bee bii di maĩ yāao. Legūgbe pì pɔ pɔ ku baasi Masa busuĩnɔ asoo kè piki, gbēnesīnanɔ kũ tibɔnɔdo kũ bua pɔnɔdo piki. À lakpe linɔ è'è piki. Gosē b̀usu gu pɔ Isila'ilanɔ ku an legūgbe pì di kaũo a do.

Fili'auna Musa kũ Halunado s̀isi a ònné: Didi sà ma duunakè. Deke dake yā nnae, maakũ kũ ma gbēnɔdo taalidenɔn wá ũ. À kute kpane. Legū pūtāna kũ legūgbe dido à m̀ò sà. Maa á gbɛe sà, wàa gianɛ dɔo. Musa òne: Tó ma bo be kpe, mí maa ɔnɔ d̀ò Deke kīa ɔdi, legū pūtāna da zɛ, legūgbe dí laka, pɔ ò le ò d̄ tɔtɛ Deke pɔɛ. Es̄ó má d̄ pɔ m̀ɔkɔn kũ n ibaanɔdo, áda vīake Deke Luaneɔ ee tia.

Naga kũ kologoido yōkpà, pɔ naga p̀uia mí kologoi wasaa b̀ò yādi. Ese kũ weado di yōkpao, pɔ andi ma gbezā yādi. Musa b̀ò Fili'auna kīa à g̀e be kpe, à a ɔnɔ d̀ò Deke kīa ɔdi, akũ legū pūtāna kũ legūgbedo zè, legū di ma dɔo. Pɔ Fili'auna è legū kũ legūgbedo kũ legūpūtānado zè, à g̀i ada duunake, a swá gbāakũ, akũ kũ a ibaanɔdo. A swá gbāa, à g̀i Isila'ilanɔ gbɛedi lapɔ Lua gīake à ò Musane à òneba.

Kwanɔ kanaú

Deke ò Musane: Ge Fili'auna kĩa, zaapɔ ma a swa fɛ̀ kũ a ibaanɔdo, pɔ mà ma yãdonadona dinɔ ke an guaũ, pɔ ò le ò o n nenɔne kũ n tokonanɔdo lapɔ ma ãadà Masa gbɛ̀nɔwa kũ yãdonadona pɔ ma kè an guaũdo, í dɔ maakũe Deke. Akũ Musa kũ Halunado gɛ̀e an ò Fili'aunane: Deke Ibalaninɔ Lua ò, ndakũ ku mikutenane sai ee bɔezĩ ni? Ò a gbɛ̀nɔ gbɛe an ge an zɔbene. Tó n gi an gbɛedi, zia àa kwanɔ ka n busuũ, anda da tɔɔtela, wàa gu eo, andí letɛ pɔ pɔ gɛ̀nne legũgbɛ kpenɔwa kũ linɔdo piki. Anda ka n kpenɔ pa kũ n ibaanɔ kpenɔdo kũ Masa gbɛ̀nɔ kpenɔdo piki. N maenɔ kũ n dezinɔ andi a taka e yãao, zaa gɔɔ pɔ an zĩte busuũ la ee mɔna gbãa. Akũ Musa sùka à bò Fili'auna kĩa.

Fili'auna ibaanɔ òne: Gbɛ pinɔ dakũ muse kpawadi maka ee bɔezĩ ni? Gbɛ pinɔ gbɛe an ge an zɔ be Deke an Luane. Mba dɔ pɔ Masa yɔ̀kpào de? Akũ wà sùka wà sù kũ Musado kũ Halunado Fili'auna kĩa, à ònné: À ge à zɔ be Deke á Luane. Á guaũ dinɔ mí da gei? Musa wène à ò: Nenɔ kũ gbɛ zɔ̀kɔ̀nɔdo. Wáa ge wa piki kũ wá nenɔgɔ̀nanɔdo kũ wá nenɔgbɛ̀nɔdo kũ wá sãnɔdo kũ wá benɔdo kũ wá zunɔdo, zaapɔ Deke dikpe an wáda ge kedi. Akũ à ònné: Tó ma á gbɛe kũ á nɔgbɛ̀nɔdo kũ á nenɔdo á piki, Deke á bo! À laakaika! Á yidi à fɛ̀madoe. Aai! Á nɔgɔ̀nanɔ mí anda ge an zɔbe Dekene, zaapɔ bee mí a là. Akũ wà an ya Fili'auna kĩa.

Deke ò Musane: Ñ n ɔɔ dɔ Masa busula, kwanɔ dí ká, andí sē kũ lá pɔ bò legũgbɛ kpenɔdo be piki. Pɔ Musa a gò dè Masala, Deke bò kũ ěnido zĩte ɔdi, ada vũ bũsu piwa fãatẽ kũ gwãafĩdo zesai. Pɔ gu dè, zĩte ɔdi ěni pì sù kũ kwanɔdo. Akũ kwa pinɔ m̀ an kù Masa busula piki. An dasi de kaaku pɔnɔla, mí a taka da ke zĩke dɔo. An kpàte tɔɔtewa gukepikiũ, akũ tɔɔte kè sii. An sē kũ lanɔdo kũ line pɔ bò legũgbɛ kpenɔdo bè piki. Sē kó lá ke ba ku Masa busuũ dɔo.

Gũ gɔɔ Fili'auna Musa kũ Halunado sisi à ò: Ma duunakè Deke á Luane kɔa ado. À suu kemado gẽn do dɔ kũ ma duunado, í kute kpamea Deke á Luane à kaate di kẽma. Pɔ à bò Fili'auna kĩa, à kutɛkpà Dekene. Akũ Deke bò kũ ěni gbãado musu ɔdi, à m̀ à kwanɔ sète à kà Teku Těaũ. Baa kwa mendo di gɔ Masa dɔo. Deke Fili'auna swa fẽ, akũ i Isila'ilanɔ gbɛɛo.

Gusia dana Masala

Deke ò Musane: ɔ se musu, gusia pɔ wàa le wà ɔnawa dí da Masala. Pɔ Musa ɔ dè musu, akũ gusia geete dà Masala gukepikiũ ee gɔɔ aakɔ. Wìdi kɔ eo, mí gbẽke di le à bò a gbẽũo ee gɔɔ aakɔ pì. Esɔ gupua ku gu pɔ Isila'ilanɔ ku piki.

Akũ Fili'auna Musa sisi à ò: À ge à zɔ be Dekene kũ á nɔgbẽnɔdo kũ á nenɔdo piki, í á sãnɔ kũ á benɔdo kũ á zunɔdo tó. Musa ò: To wàkũ wá sa'obɔnɔ kũ sa pɔ wì a pɔ ka tɛũ à tekũ obɔnɔdo kũna, pɔ wà le wà sa'odo Deke wá Luawa. Sema wà ge kũ wá tibɔnɔdo, baa mendo da gɔɔ, zaapɔ an guaũ an wáa

sa'obɔnɔ sɛ wà sa'odo Deke wá Luawa. Ee wàkū ge kadi gū, wába dǎ pɔ pɔ wá sɛ wà sa'odowa gǎao. Deke Fili'auna swa fɛ̀, akū i we à an gbɛɛo. Fili'auna ò Musanɛ: Gomea gū! Su ò tó wá wé ke siikǎ dɔo. Zí pɔ wa wesì kǎle, nda ga. Akū Musa ò: Lapɔ n òba, maa wesinle dɔo.

Masa nenɔgɔna kaakunɔ gagana

À m̀ à lè Deke ò Musanɛ yāa à ò: Maa ĩada Fili'aunawa kū Masa busudo gɛn do dɔ, i basa à á gbɛɛ. Tó ada á gbɛɛ, àa á ya fa! O gbɛnɔnɛ an baapiki nɔgɔna kū nɔgbɛdo an suluba pɔnɔ kū zĩnali pɔnɔdo wobi ke gbɛ pɔ an a vĩ Masa gbɛ ũwa. Maa tó Masa gbɛnɔ Isila'ilanɔ wɛ gwa. Musa sǎ a bɛena vĩ Masa Fili'auna ibaanɔnɛ kū a gbɛnɔdo.

Akū Musa ò Fili'aunanɛ: Deke ò, gwāafĩ waido akūda vĩ Masa busula, Masa nenɔgɔn kaakunɔ dí gaga piki sena zaa Fili'auna pɔ zĩtena guuwa nɛwa ee à ge à pɛ nɔgbɛ zĩkenna pɔ andì wititi lɔnɔ nɛwa kū tibɔ nesa kaakunɔdo piki. Wiki gbāa da da Masala gukepikiū, a taka di ke yāao, mí àa ke zĩke dɔo. Esǎ Isila'ilanɔ guaū baa gbɛ da gboke gbɛnesĩna kó tibɔwao, pɔ ò dǎ Deke Masa gbɛnɔ dǎ kǎnɛ kū Isila'ilanɔdo yādi. N ibaa dinɔ da mɔ ma kĩa piki, andí kute kpamea, andí o mà ge kū ma gbɛnɔdo piki. Bee kpɛ sà mí ge. Akū Musa b̀ Fili'auna kĩa kū pɔpa zǎkǎdo.

Deke ò Musanɛ yāa: Fili'auna da n yā mao, pɔ ma yādonadonakenanɔ le an dasikū Masa yādi. Musa kū Halunado

yādonḡona pinḡ kè Fīlī'auna εε pīkī, akū Deke a swa fē. À gī Isīlā'ilanḡ gbēedi an bo a busu.

Vīnanlamusu dikpe

Deke yā'ò Musane kū Halunado Masa à ò: Mḡḡ di dakū deane mḡ kaaku ũ wè kū wèdo. À o Isīlā'ilanḡne pīkī, mḡḡ di gḡḡ kwīde zī cū kū cūdo pīkī andadi sã se mendodo. Tó cū gbēḡo dasi di ka an sã mendo so pīkīo, anda se kū cū pḡ an ku kḡ seedo a gbēḡo dasi lēū, pḡ a kḡḡ su à gḡḡ yādi. À sãsa kó besa ne bḡḡo pḡ ba sãnka vīo se. Isīlā'ilanḡ pīkī, baapīkī a pḡ gwa ee mḡ di gḡḡ gēo mendosaide zī. Okḡsi i de, i a au ma kpé pḡ wàa a nḡḡo soū kpēle gīnḡwa, ḡpīadi kū ḡzengēdo kū musudo. Gwāafī dokū pī à nḡḡo pī kpa tela, í so kū kaado kū lá kīkādo. Á su à so búsu kó fufukenao. À kpa tela kū a mīdo kū a gbanḡdo kū a guū pḡnḡdo. Á su à to gu ḡḡ a kḡḡwao. Tó a kḡḡ gḡ, à ka tēū à tēkū. Tó áda so, à asane ḡḡ, í kete kpa, á gopanna kū nana á ḡzī, í so kpaaka, zaapḡ Deke Vīnanlamusu sa'obḡe.

Gwāafī pī maa vī Masala mà nenḡḡḡn kaakunḡ ḡede búsu pīū gukepīkīū kū tībḡ nesa kaakunḡdo pīkī, mī we'ida Masa tāanḡwa. Maakūe Deke. Au pī díkū de seeda ũ kpé pḡ á kuūwa. Tó máda ḡḡ Masa gbēḡwa, tó ma au pī è, maa gēteala, gaga pī ḡa á leo. Àdi gḡḡ pī di ma dikpe ũ a yā kū ḡḡaū yādi, íkū dikpe pī ke fetenkanalayā ũ ee á buiwa.

Kaasona dikpe

Àdi kaa so ee gɔɔ soopia. A gɔɔ kaaku zí àdi flawa eze pɔ ku á kpunɔ kóte, zaapɔ gbě pɔ pɔ fetena sò gɔɔ soopia piũ, wàa a bo Isila'ilanɔ guaũ wà de. A gɔɔ kaaku zí kũ a gɔɔ sopiadedo àdi kɔ kakaa ma yã musu. Á su àdi zĩ ke ke gɔɔ beenɔ zĩo, sema pɔbenakena gběmpikine baasio, a len nu. Àdi Kaasona dikpe ke, zaapɔ zĩbeezi an ma á búte Masa landɔ zĩkannanɔba. Á buinɔ díkũ dikpe pì ke wakewatokɔne ũ. Mɔ kaaku gɔɔ gěo mendosaide zĩ ɔkɔsi, àkũ kaa so ee a gɔɔ bao kũ mendodode zĩ ɔkɔsi. Flawa eze su akũ ku á bewao ee gɔɔ soopia, zaapɔ gbě pɔ pɔ fetena sò, bommo ya, bede ya, wàa a bo Isila'ilanɔ guaũ wà de. Á su àdi pɔ fetena so gɔɔ beeo. Gu pɔ á ku piki, àdikũ kaa so.

Vĩnanlamusu dikpe kaaku

Musa Isila'ila gbě zɔkɔnɔ sisi piki, à onné: À ge à á ɔũ sã se, í de Vĩnanlamusu dikpekebo ũ. À ese sako se à zĩ au pɔ ku taũwa, í ma kpele gĩnɔwa, ɔpiadi kũ ɔzengedo kũ musudo. Á gběke su à bo a kpuo ee gu dɔ. Tó Deke dá vĩ busula ada Masa gběno dede, tó à au è kpele gĩnɔwa, àa vĩala. Àa to gbědedenna gěadi à á dedeo. Aakũnɔ kũ á buinɔdo àkũ yã pì kũna wakewatokɔne ũ ee á buiwa. Tó a gě bũsu pɔ Deke da á gbaũ lapɔ à a le dianeba, àkũ wakewatokɔne pì kũna. Tó á nenɔ wakewatokɔne pì yã làawa, à onné a de Vĩnanlamusu sa pɔ wì o Dekewa ũ, zaapɔ pɔ à Masa gběno dede, à gète wá Isila'ilanɔ

kpenɔwa, i wá dedeo. Akū gbēnɔ kùte Dekene an mi pètene. Pɔ an tà, an kè lapɔ Deke ò Musane kū Halunadoba.

Masa nenɔgɔn kaakunɔ gagana

Gwāafī waido Deke Masa nenɔgɔn kaakunɔ dède piki sena zaa Fili'auna pɔ zītena guuwa newa, ee à gèe à pè dakpunnano newa kū tibɔ nesa kaakunodo piki. Fili'auna fète gwāafī kū a ibaanodo kū Masa gbēnodo piki, akū wiki gbāa dà Masala, zaapɔ ɔũ ke ba ku gè saio. Gwāafī an Fili'auna Musa kū Halunado sisi à ònné: À fete à bute kū Isila'ilanodo ma gbēnɔ guaũ. À ge Deke sisidi lapɔ a òba. À á benɔ kū á sãnodo kū á zunodo sete lapɔ a òba. À ge, í sa maa omɛa sɔ̃.

Masa gbēnɔ dá nake gbē pinɔwa an buteíne an busuũ kpaaka, zaapɔ an ò: Wáa gaga piki. Isila'ilano an flawadenano kà tanɔũ a eze sai, an an utano yiyiwa an dàda an gāngu. An kè lapɔ Musa ònnéba, an suluba pɔnɔ kū zĩnali pɔnodo kū pɔkasanodo làla Masa gbēnɔwa. Deke tò Masa gbēnɔ an we gwà, akū an kpàmmá. Maka an Masa gbēnɔ pɔnɔ simmá.

Isila'ilano dana zeũ

Isila'ilano dà zeũ gese, an bùte kū Lamesedo an tà Suko. Nɔgɔnanɔ oaa sɔsɔɔ lee oaa aakɔ̃ (,), nenɔ kū nɔgbēnodo baasi. Bui zītɔ donadonano tãndo dasi dɔ. Benɔ kū sãnodo kū zunodo dasi kè zài. An kaa kè kū flawadena pɔ an bòdo Masa. Aba flawa eze vĩo, zaapɔ wà an ya Masa zezesai. Andi pɔbena mana le an sè pɔ anda be zeũo.

Isila'ilano kuna Masa kè wè oaa pia kũ baakwido. Wè oaa pia kũ baakwido pì kpe, dikpe pì zí an Deke zíkanna pinò bùte Masa piki. Gwāafí pì Deke pɔe. Isila'ilano díkũ itèke gɔɔ piwa ee an buiwa, zaapɔ gwāafí pì an Deke Isila'ilano butena Masa itèkè.

Vīnanlamusu dikpe

Deke ò Musane kũ Halunado: Vīnanlamusu yā pɔ má dìn di: Bui ke su à nɔbɔ soo, esɔ zò pɔ a lù mí à tɔzè da so. Nibɔ kó foikenna su à soo. À so kpu, á su à bo kũ a nɔbɔ pido baasio. Á su à sã pì wá ke eo. Isila'ila piki dí dikpe pì ke. Tó bommo ku á guaũ, mí a yidi à Vīnanlamusu dikpe ke Dekene, à tɔzè a be nɔgɔnanone piki, i gɔ bede ũ, i basa ke. Tɔzɔnsaide su àdi soo. Bede kũ bommo pɔ kuadonɔdo, ikoyã dokũ pie. Akũ Isila'ilano kè lapɔ Deke ò Musane kũ Halunadoba piki. Zíbeezi Deke Isila'ilano bùte Masa gāagāa.

Kaasona dikpe kũ nenɔgɔn kaakunɔ kpana Luawado

Deke yā'ò Musane à ò: Isila'ila nenɔgɔn kaakunɔ kũ tibo nesa kaakunɔdo kpama, zaapɔ ma pɔnɔe piki.

Musa ò gbēnɔne: Á bona Masa zɔbenaũ gɔɔ di yā kũ dɔaũ, zaapɔ Deke mí á bó Masa kũ a ɔ gbāado. Á su àdi pɔ fetena so gɔɔ piwao. Áda bo Masa mɔ kaaku pɔ wì o Abibuũ gbāa. Deke ledà á dezinone à ò akũda bùsu pɔ vī kũ zɔ'ido dasi kpaawa, gu pɔ Kanaanɔ ku kũ Hitinɔdo kũ Amolinɔdo kũ Hivinɔdo kũ Yebusinɔdo. Tó à tò a ka bùsu pìũ, àdi dikpe pì ke mɔ diũ. Akũ kaa so ee gɔɔ soopia. A gɔɔ soopiade pì zí díkũ deane Deke dikpe

ũ. Àdikũ kaa so ee gɔɔ soopia pì ge à pado. Pɔ fetena kó flawa eze su akũ ku ɔũ ke á busuũ gɔɔ beewao. Gɔɔ bee àdi o á nenɔgɔnanɔne áda bee ke yã pɔ Deke kèane pɔ à á bute Masa yãdi. Dikpe pì díkũ deane seeda ũ landɔ pɔ dana ɔwa kó yãdɔũbɔ yina eewaba, pɔ Deke ikoyã su à bo á leũo, zaapɔ akũ mí à á bute Masa kũ a ɔ gbãado. Àdikũ ikoyã pì ke a gɔɔwa wè kũ wèdo.

Tó Deke tò a ka Kanaa busuũ, mí à kpàawa lapɔ à a ledàane kũ á dezinɔdoba, à á nenɔgɔn kaakunɔ kpawa piki. Á tibɔ nesa kaakunɔ díkũ de a pɔ ũ piki. Àdi á faaga nesa kaaku lenkpa kũ sãnedo. Tó i lenkpaɔ, à a waka ε. À á nenɔgɔn kaakunɔ lenkpa piki. Tó á nenɔgɔnanɔ á lá yã pì bɔketedi zia an ò, bó yãn nui, à onné, pɔ Deke wá bó zɔbenaũ Masa kũ a ɔ gbãado yãε. Pɔ Fili'auna swagbãa kè à gì wá gbèedi, akũ Deke Masa nenɔgɔn kaakunɔ dède piki kũ tibɔ nesa kaakunɔdo piki. A yãdi an wi sa'owa kũ tibɔ nesa kaakunɔdo, mí wi wá nenɔgɔn kaakunɔ lenkpa. Bee dakũ de seeda ũ landɔ pɔdana wá ɔwa kó pɔyina wá eewaba, zaapɔ Deke mí wá bó Masa kũ a ɔ gbãado.

Isila'ilanɔ bona Masa

Pɔ Fili'auna Isila'ilanɔ gbèe, Lua di bońdo Filisitini bùsu zeũo, baa pɔ a kãi, zaapɔ à ò: Tó wà fètemmá kũ zĩdo, anda sukana Masa laasooke. Lua dònne εε, à gugbangbe zé sèndo Teku Tëa ɔdi. Isila'ilanɔ bò Masa an an zĩkabɔnɔ kũna.

Musa Yusufu gè sè, ada tado, zaapɔ Yusufu tò Isila'ilano le diakũne yã à ò, tó Lua mò an bodi, anda akũ gɛwa sete an bodo gũ.

Pɔ an bò Suko, an gèe an bùa kàte gugbangbe lewa Etamu. Deke dikũ gënné eɛ tekuse petenaũ fãatẽ, pɔ àkũ ze mɔnné. Gwãafĩ sɔ, ikũ gënné eɛ te petenaũ pɔ àkũ gupua kũnné, andíkũ ta'o fãatẽ kũ gwãafido. Tekuse petena pì dí go an eɛ fãatẽo, mí tekuse pì dí go an eɛ gwãafio.

Masa gbẽno petena Isila'ilanodi

Deke ò Musane: O Isila'ilanone an lite an ge an bùa kate Pi Hahilo see Migidoli kũ tekudo zãngua, bokɔwa kũ Baalizerfɔdo. À bùa kate teku see gũ. Fili'auna dakũ e a sãsã, gugbangbe á kũkũ. Maa a swa fẽ, i peteadi, mí tɔbo Fili'auna kũ a zĩkannanɔdo yã musu, Masa gbẽno díkũ dɔ maakũe Deke. Akũ Isila'ilano kè maka.

Pɔ wà ò Masa kia Fili'aunane gbẽ pinɔ basi, akũ kũ a ibaanɔdo nese ke sè an yã musu an ò: Laba wa kè wa tò Isila'ilano bò zɔbenawẽaũ? Akũ Fili'auna go dɔ a sɔne, à a zĩkannanɔ nàkãa. À sɔgo maanɔ sè oaa aakɔ kũ Masa sɔgonɔdo piki, zĩkan kianɔ kaú. Deke Masa kia Fili'auna swa fẽ, akũ à pète Isila'ilanodi, andá bute an mi dana ila. Akũ Masa gbẽno pèteíndi kũ Fili'auna sɔnɔdo kũ a sɔgonɔdo kũ a sɔdenɔdo kũ a zĩkannanɔdo piki, akũ andá mó an ledi an bùaũ teku see Pi Hahilo see bokɔwa kũ Baalizerfɔdo.

Pɔ Fɪlɪ'auna kà kǎi, Isilá'ilanɔ wɛ zù, akū an Masa gbě̀nɔ è te an kpɛ. Vĩa an kū maamaa, akū an wikipè Dekewa. An ò Musanɛ: Mianɔ ba ku Masao ya? Bɔyǎdi n mɔwado gugbangbeũ la wà gagai? À kè laba n wá bute Masai? Wi onne zaa Masao de? Wi o ò wá tó tɛ wà zɔbe Masa gbě̀nɔneo de? Zɔbenanné maawěa de gagana gugbangbeũla. Musa ònné: Á su à to vĩa á kũo. À zɛ tɛɛ, í e lapɔ Deke da á suaba gbāa, zaapɔ Masa gbě̀ pɔ áda an e gbāanɔ, áa an e zĩke dɔo. Deke mí da zĩkaane. Áakū ku kidikidi.

Buana Teku Těawa

Deke Musa là à ò: Bó wiki nda pɛmai? O gbě̀nɔne an bo kũ tado. Ñ n gopanna dɔ teku musu, ndí paado, Isilá'ilanɔ dí gě an zāngua gu giiwa. Maakū, maa Masa gbě̀nɔ swa fě, andí gě an kpɛ, mí tɔbo Fɪlɪ'auna kũ a zĩkannanɔdo kũ a sɔgonɔdo kũ a sɔdenɔdo yā musu. Tó ma tɔbò Fɪlɪ'auna kũ a sɔgonɔdo kũ a sɔdenɔdo yā musu, Masa gbě̀nɔ dí dɔ sà maakūɛ Deke. Lua Malaika pɔ ku Isilá'ilanɔ ɛɛ sùka à gèè à ku an kpɛ, mí te pɛtena pɔ ku an ɛɛ sùka à gèè an kpɛ dɔ an zāngua kũ Masa gbě̀nɔdo. Tekuse pɛtena pì gupua kũ Isilá'ilanɔne mí à gusia kpà Masa gbě̀nɔne, akū an gbě̀ke di le à nà a dakewa gwāafĩ beeo.

Pɔ Musa ɔ dɔ tekuwa, akū Deke bò kũ ěni gbāado zĩte ɔdi. À kàka ee gu gèè à dòdo, à teku sète à kpà ee gu gii bò. Pɔ í zě, akū Isilá'ilanɔ ta'ò gu giiwa an bùa. Í pì denné lan gĩba an ɔpiadi kũ an ɔzengɛdo. Akū Masa gbě̀nɔ pèteńdi. Fɪlɪ'auna sɔnɔ kũ a sɔgonɔdo kũ a sɔdenɔdo piki an te an kpɛ tekuũ. Gudɔdo Deke

Masa zĩkannanɔ gwà zaa te pɛtenaũ, akũ à tò bidi gɛ̀ú. À tò an sɔ̄gonɔ v̄ite, à tò an ta'ona zĩ ïi kũ, akũ an ò: Wà basi Isila'ilanɔne, zaapɔ Deke dá zĩkannéwado.

Deke ò Musane: N̄ ɔ dɔ tekuiwa, í dí da Masa gbēnɔla kũ an sɔ̄gonɔdo kũ an s̄denɔdo. Akũ Musa ɔ dè tekuiwa, akũ í dá pa a gbēũ gudɔdo. Lapɔ í dá su maka, akũ Masa gbēnɔ basi an kpàkĩdo. Gũ Deke tò tekui tãñle. Í sù à dà sɔ̄gonɔla kũ s̄denɔdo kũ Fili'auna zĩkana pɔ gɛ̀ tekui Isila'ilanɔ kpenɔdo piki. An ke di boo, baa mendo. Isila'ilanɔ s̄ an ta'ò í zãngua gu giiwa. Í pì kè lan gĩba an ɔpiadi kũ an ɔzengedo. Zĩbeezĩ Deke Isila'ilanɔ s̄i Masa gbēnɔwa, akũ Isila'ilanɔ Masa gbē pinɔ gènɔ è tekui lewa. Pɔ Isila'ilanɔ Deke gbãa zĩkã pɔ à m̄ Masa gbēnɔne è, an v̄iamàne, akũ an a naaike kũ a zɔbenna Musado.

Musa le

Akũ Musa kũ Isila'ilanɔdo piki le di s̄i Dekene an ò:

Maa lesi Dekene, zaapɔ à tɔbò,
à s̄denɔ kũ an s̄nɔdo kà tekui.

Deke mí ma gbãa ã,
maa le mawa, akũ mí ma suabà.

Akũ mí ma Lua ã,
maa a taakile.

Akũ mí ma mae Lua ã,
maa a tɔbo.

Deke zĩkanae, a tɔn Deke.

À Fili'auna sɔgonɔ kũ a zĩkannanɔdo kà tekuũ,
à zĩkan kianɔ nì Teku Těaũ.

Í pì dàńla,

an tà zĩte landɔ gbèba.

Deke, n ɔpia n gbãa tɔbò,

Deke, n n ibeɛnɔ lò kũ n ɔpiado.

N n ibeɛnɔ nè n gakwi zɔkɔu,

n pɔ pà, n an kwe landɔ sèba.

N pɔ bò n niũ, akũ í fète,

a zena landɔ gĩba,

teku í ì a guaũ.

Wá ibeɛ pinɔ ò,

anda petewadi an wá le,

andí wá pɔnɔ siwa lapɔ an yidiba,

andí an fěndanɔ wo an wá dededo.

N n le'ěni gbèe, akũ teku dàńla,

an tà zĩte landɔ dalamaba í zɔkɔ piũ.

Deke, tãa kpete mí mukãndoi?

Dí mí mukãndoi?

Yãbonsɛekenna, n zɔkɔke dona,

n gakwi dì to vĩa wá kũ.

N n ɔpia dò, akũ tɔɔte an mɔmɔ.

Nda gě wá gbě pɔ n wá bonɔne eɛ n maakeũ,

nda gewado n busuũ kũ n gbãado.

Tó bui kenɔ mà, anda lukpalukpa,

Filisitini busudeno s̄đ dá kē.
Edomuno kiano da bidike,
bidi da gē Mōabu dōn'ēdenoũ,
Kanaa busudeno kā da ga an piki.
Vīa zōkō da an kũ, an s̄đ dí kē,
anda gō kidikidi landō gbēba n gbāa zōkō yādi Deke,
ee wá gbē pō n wá lé n pō ūno gēte.
Deke, nda gewado gbesīsī pō n sè n pō ū kīa,
ndí wá zīnnapete gu pō n dī n zītēkīi ū,
n kukīi pō n kēke n gīnane.
Deke dakū kpatabe gōkēpiki.

Pō Fili'auna sōno kũ a sōgonodo kũ a sōdenodo gē tekuũ,
akū Deke sù kũ ído à dàńla, esō Isila'ilano ta'ò gu giiwa teku piũ.
Akū anabi Miliamu, Haluna dakūn nōgbē, sekesekena sè, akū
nōgbēno bō an tēdi piki, andá sekesekena le, andá ū wā. Miliamu
le sinné à ò:

À lesi Dekene, zaapo à tōbò,
à sōdeno kũ an sōnodo kà tekuũ.

Í ïi

Musa dà zeũ kũ Isila'ilanodo, an kē Teku Tēawa an gē Sulu
gugbangbeũ. An ta'ò gōo aakō gugbangbe piũ, andi í leo. Pō an
kà gu pō wì o Mala, andi f̄ an a í mīo, pō a ïi yādi. A yā mí tò
wà tōkpà gu pine Mala. Akū gbēno yākete kē Musane an ò: Bó
wáa mii? Musa wikipè Dekewa, akū Deke lí mōne. Pō à zù iũ,

akū í pì nna kũ. Gũ Deke ikoyã ònné à an yõ à ò: Tó a laakai dò ma Deke á Lua ma yãwa mí áda yã pɔ má yidi ke, tó a ma yãdinnenɔ mà mí á ma ikoyãɔ kũna piki, maa gyã pɔ ma kà Masa gbẽnɔũ ke kaúo, zaapɔ maakũe Deke á lootoo ũ. Bee kpɛ an kà Elimu, gu pɔ gbɛ'i men kwi weepianɔ ku kũ daminɔ lí men baakõkwinɔdo. Akũ an bùa kàte í sɛe gũ.

Manna kũ buubuunanɔdo

Isila'ilanɔ fète Elimu an piki, akũ an kà Sini gugbangbe pɔ ku Elimu kũ Sinaido zãngua an bona Masa mɔ piade gɔɔ gẽode zí. Akũ an yãkete kè Musa kũ Halunadone gugbangbeũ gũ an piki, an ònné: Bɔyãdi Deke di wá dede Masao ni? Gũ wi zíte wà pɔbe kũ nɔbɔdo ee wà ká, akũ a mɔ wá dededi gugbangbeũ la kũ nɔado.

Deke ò Musane: Kuna zaa musu maa pɔbena fákeane, gbẽnɔ dí bute gɔɔ do pɔ setedi lapɔ gu dá dɔ an dasi leũ, pɔ mà an yõ mà gwa tó an ma ikoyã kũna. Gɔɔ soododezĩ gɔɔ pia pɔ an andadi sete, andadi a pɔbena ke. Akũ Musa kũ Halunado ònné piki: Gbãa ɔkɔsi áa dõ pɔ Deke mí á bute Masa, zia kɔnkɔ í Deke gakwi e. À yãkete pɔ a kèakũne mà, zaapɔ peken wá ũ pɔ a basa a yãkete kèwadio. Musa sùka à ò: Deke da á gba nɔbɔ à so gbãa ɔkɔsi, zia kɔnkɔ i pɔbena kpaawa á dasi leũ, pɔ à yãkete pɔ á kèakũne mà yãdi. Peken wá ũo. I ke waakũnɔ a yãkete kèwadio, Dekeɛ.

Akū Musa ò Halunane: O Isila'ilanone piki an na Deke see, zaapo à an yāketekena mà. Pɔ Haluna dá yā'onné, an eedò gugbangbe odi, akū an è Deke gakwi bòmmá tekuse petenaũ. Akū Deke yā'ò Musane: Ma Isila'ilano yāketekena mà. Onné gbāa ɔkɔsi anda nɔbɔ so, zia kɔnkɔ anda pɔbe an ká, andí dɔ maakūe Deke an Lua.

Ɔkɔsi buubuunano m̀ an li an bùala. Pɔ gu d̀ fii kpà à likadi. Pɔ fii kwè, akū pɔ g̀ kate tɔtewa puu ketekete landɔ kpɔ tekeba. Pɔ Isila'ilano è, an ò kɔne: Bɔn nui? Zaapo andi dɔ ba bɔndo. Musa ònné: Pɔbena pɔ Deke kpàawa à ben nu. Yā pɔ Deke dianen di: Á baapiki dí sete á dasi leũ. À sete á baapiki miwa zaka lé dodo á ɔ̀deno leũ. Isila'ilano kè maka. An sète, gbēkeno pɔ dasi, gbēkeno pɔ ba dasio. Wà zaka dàũ, pɔ gbē pɔ sète dasi kɔ su à gɔ, mí gbē pɔ di sète dasio a pɔ su à kīsāo. Musa ònné: Gbēke su à kɔ tó ee kɔnkɔ. Gbēkeno di Musa yā mao, an a kɔ tò ee kɔnkɔ, akū à kɔkɔkà à v̀, akū Musa pɔ pà gbē beenodi.

Lapo gu dá dɔ baapiki di sete a dasi leũ. Tó isātē gbāakū, pɔ pɔ g̀ tɔtewa di yɔ. Gɔ soodode zí an pɔbena sète lee pia, baapiki miwa zaka lé piapia. Akū an gbē zɔkɔno gè an ò Musane an piki. À ònné: Maka Deke di. Zia kāmabozīe, Deke gɔe. À pɔ pɔ á yidi à kɔsa kɔsa. À pɔ pɔ á yidi à disa disa, í a kɔ pɔ g̀ di ee kɔnkɔ. An di ee kɔnkɔ lapo Musa òba. Bee di vāo, i kɔkɔkao. Akū Musa ònné: À be gbāa, zaapo kāmabozī, áa e guke

gbāao. Àdikū sete ee gɔɔ soodo. A gɔɔ sopiade kāmabozīe, àakū ku gɔɔ beeo.

Gɔɔ soopiadezī gbēkenɔ bò setedi, akū andi leo. Akū Deke ò Musane: Áakū ku kū ikoyā pɔ má dìnɔ masaido ee bɔɛzī ni? Akū dō pɔ ma Deke maakū mí ma kāmabogɔɔ dìane. A yā mí tò gɔɔ soododezī mi gɔɔ pia pɔbena kraawa. Baapiki díkū ku a gbēū, gbēke su àdi bo gu pɔ a ku gɔɔ soopiade pì zīo. Akū an kāmabò gɔɔ soopiadezī. Isila'ilanɔ tɔkpà pɔbena pine Manna. A de landō pɔwen pua ketenɔba. A í nna landō kaa zɔdeba.

Musa ò: Yā pɔ Deke dìn di: Wà manna zaka lé do di wá buinɔne, pɔ an pɔbena pɔ à kpàawa wá bè gugbangbēū wá bona Masa kpe e sō. Akū Musa ò Halunane: Bella se ò manna zaka lé do kaū, ndí di Deke ee, pɔ àkū dina wá buinɔne. Akū Haluna dì gbè alonɔ seɛ, pɔ àkū dina lapɔ Deke ò Musaneba. Isila'ilanɔ manna bè wè bapia ee an gèe an kàdo bùsu pɔ gbēnɔ ku. An manna pì bè ee an gèe an kàdo Kanaa bùsu lewa. Zaka lé do lita pia.

Í bona gbēū

Isila'ilanɔ fète Sini gugbangbēū an piki, andá bùa katekate lapɔ Deke ònnéba, akū an gèe an bùa kàte Lefidimu. Andí í le gū an mío, akū an yākete kè Musane an ò: Wá gba í wá mi. À ònné: Bɔyādi áda yākete kemeai? À kè laba áda Deke lé wei? Pɔ imi dá an de, akū an yākete kè Musane an ò: Bɔyādi n wá bute Masai? N yidi ò wá dede kū imido kū wá nenɔdo kū wá tibɔnɔdo

ya? Akū Musa wikipè Dekewa à ò: Laba maa ke kū gbě pinḁdoi? À gḁ yḁnkḁn an ma papa kū gbèdo an ma dɛ. Deke ònɛ: Isila'ila gbě zḁkḁnḁ sete, í gḁ gbě pinḁnɛ ɛɛ. N̄ n gò pḁ n Nilu lèdo se dḁ. Maakū zena n ɛɛ Holebu gbèwa gū. Gbè pì lé, í dí bo, andí mi. Akū Musa kè maka Isila'ila gbě zḁkḁnḁ wewa. Akū wà tḁkpà gu pine Masa, zaapḁ gū an Deke lɛwɛ an ò: Deke kuwadon di ya? Wà tḁkpànɛ Meliba dḁ, pḁ Isila'ilanḁ yākete kè gū yādi.

Zīkana kū Amalekinḁdo

Amalekinḁ mḁ zīkadi kū Isila'ilanḁ Lefidimu. Akū Musa ò Yosuanɛ: Gbḁnḁ pɛpɛwɛa, í ge à zīka kū Amalekinḁdo. Zia maakū zena sīsī di musu kū Lua gòdo kūna. Yosua kè lapḁ Musa ònɛba, à gèɛ zīkadi kū Amalekinḁdo. Akū Musa kū Halunado kū Huludo dèdɛ sīsī pì musu. Tó Musa a ḁnḁ sè, Isila'ilanḁ dīkū Amalekinḁ be, esḁ tó à a ḁnḁ pìta sḁ, Amalekinḁ dīkū Isila'ilanḁ be. Pḁ Musa ḁnḁ wā, akū wà gbè sè wà dī a zīte, à zītɛwa, akū Haluna kū Huludo an a ḁnḁ kūkūna, gbḁdo ḁpiadi, gbḁdo ḁzengɛdi, akū a ḁnḁ gḁ zena ee isātɛ gèɛ à lètɛ. Akū Yosua zībɛ Amalekinḁwa, à an dɛdɛ kū fḁndado.

Deke ò Musanɛ: Bee kḁ takadaū àkū dɛ yādcūbḁ ũ, ndí o Yosuanɛ, zaapḁ maa Amalekinḁ kaate ānuau piki. Musa sa'okīi bḁ, akū à tḁkpànɛ Dekematuuta à ò: À Deke tuuta dḁ musu, Deke dīkū zīka kū Amalekinḁdo gḁḁkepiki.

Yetolo gena Musa gwadi

Musa ānzue Yetolo, Midiā sa'onna, yā pɔ Lua kè Musane kũ a gbě Isila'ilanɔdo mà, lapɔ Deke an búte Masa. À mò à lè Musa a na Zipola gbèe bewa yāa kũ a nenɔgɔna men pianɔdo. A do tɔn Geesomu, zaapɔ Musa ò bùsu keũ la bommɔn akũ ũ. A do tɔn Eliezee, zaapɔ Musa ò akũ mae Lua akũ gaakè, à akũ bò Fili'auna fēnda lezĩ. Akũ Yetolo fēte ada mɔ Musa kĩa kũ a nenɔdo kũ a nado gu pɔ à bùa kàte Lua gbesĩsĩ see gugbangbeũ. À lekpele kè Musane à ò: Mada mɔ n kĩa kũ n nado kũ n né men pianɔdo. Musa bò à dà a ānzuele, à kùte à lepèwa. An kɔ aafia là, akũ an gē kpu. Musa yā pɔ Deke kè Fili'aunane kũ Masa gbēnɔdo Isila'ilanɔ yādi dɔdɔne piki kũ takasi pɔ an lé zeũnɔdo piki kũ lapɔ Deke an boũdo. Yetolo pɔ kè nna yā maa pɔ Deke kè Isila'ilanɔnewa piki kũ lapɔ à an bó Masa gbēnɔ ɔzĩdo. Akũ à ò: Wà Deke saabukpa, lapɔ à á bó Fili'auna kũ Masa gbēnɔdo ɔzĩ. Ma ḍ̣̣ sà pɔ Deke ẓḳ̣̣ de deke ḳ̣̣nɔla piki. Pɔ Masa gbēnɔ gēgēna kèawa, à ṃṇné. Akũ Yetolo sa pɔ wì a pɔ ka teũ à tekũ ò Luawa kũ sa ke onanɔdo dɔ. Akũ Haluna kũ Isila'ila gbē ẓḳ̣̣nɔdo piki an mò an pɔbèdo Lua ee.

Yākekennanɔ dina

Pɔ gu ḍ̣̣ Musa ẓ̣̣te ada yā kekenné, an katenadi zaa kɔnkɔ ee ɔkɔsi. Pɔ Musa ānzue yā pɔ ada kenné è piki, akũ à a là à ò: Bó nda ke kũ gbě dinɔdo makai? Bɔyādi nda yā kekenné n do, gbēmpiki katenandi zaa kɔnkɔ ee ɔkɔsii? Musa wène à ò: Gbēnɔ

dì mɔ ma kĩa Lua ledamma madi. Tó an yāketē vī, andì mɔ ma kĩa mà yā pì kekeñne, mí Lua ikoyā pɔ à dìnɔ onné.

Musa ānzue òne: Yā pɔ nda ke ba maa. Nda kpasā, gbē pɔ kundonɔ dí kpasā dɔ, zaapɔ zī pì denla, nda fō ñ ke n doo. Ma yā ma sà, maa ledamma, Lua díkū kundo. Ñkū denné yāfēfēkenna ũ, ndíkū ge kū an yānɔdo Lua kĩa, ndíkū ikoyā pɔ Lua dìnɔ dadanné, ndíkū zé pɔ de an se mɔnné kū yā pɔ andí kenɔdo. Gbē laakaide naaide pɔ Lua vīa vī mí andí gba sionɔ pepe an guaũ, ndí an di gbēn oaa sɔnɔ gēn'eedenɔ ũ kū gbēn basɔdonɔ pɔdo kū gbēn bapiakwinɔ pɔdo kū gbēn kwinɔ pɔdo ankū yākeke gbē pinɔne gɔɔkepiki. Andadi mɔmma kū yā zī ñinɔdo piki, esɔ andadi yā yōnkōnnanɔ keke an gĩna. Maka anda n asoo labonne. Tó Deke wènnē mí n kè maka, nda fuo, gbē pinɔ dí ta be aafia.

Musa a ānzue yā mà, à kè lapɔ à òneba piki. À gbē laakaidenɔ pèpe Isila'ila buinɔũ piki, à an dí gbēn oaa sɔnɔ gēn'eedenɔ ũ kū gbēn basɔdonɔ pɔdo kū gbēn bapiakwinɔ pɔdo kū gbēn kwinɔ pɔdo. Akū andìkū yā kekenné gɔɔkepiki. Yā zīĩ an andì mɔdo Musawa, akū andì yā yōnkōnnanɔ keke an gĩna. Musa gèe à zè a ānzue, akū à tà a busuũ.

Sinai gbesĩsĩ see

Isila'ilanɔ bona Masa mɔ aakōde gɔɔ kaaku zī an fète Lefidimu. Pɔ an kà Sinai gugbangbeũ, akū an bùa kàte gū Sinai gbesĩsĩ see. Musa dède à gèe Lua kĩa gbesĩsĩ pì musu, akū Deke

lezùdi à ò: Yã di o Yakubu bui Isila'ilanɔnɛ: A è lapɔ ma kè Masa gbɛnɔnɛ, lapɔ ma á se ma suado ma kĩa, lapɔ kúu dì a né se a gãsĩwaba. Tó a ma yã mà mí á ma í kunaado yã kũna sà, áakũ de ma gbɛ yindidenɔ ũ bui piki guaũ. Baa pɔ ãnuwa de ma pɔ ũ piki, áakũ demɛa kiano kũ sa'onnanɔ ũ, ma gbɛ pɔ an ku donano ũ. Yã pɔ nda o Isila'ilanɔnen nu.

Musa pita à gbɛ zɔkɔnɔ sisi, akũ à yã pɔ Deke ònɛ dɔdɔnné piki. An wɛnɛ piki an ò: Yã pɔ Deke òwɛa piki, wáa keɛ. Akũ Musa yã pɔ wà ò sète à gɛɛ à dɔdɔ Dekenɛ. Deke ònɛ: Maa mɔ n kĩa tekuse geeteũ, pɔ gɔɔ pɔ máda yã'onne, an le an ma, andíkũ n naai vĩ gɔɔkepiki. Akũ Musa yã pɔ gbɛnɔ ò dɔdɔ Dekenɛ. Akũ Deke ònɛ: Gɛ an kĩa, ndí onné an gbãsĩbo an gĩnanɛ gbãa kũ ziado, andí an pɔkasano pipi, andíkũ ku soodo zia baasi, zaapo a gɔɔ aakɔde zĩ maa pita mà ze Sinai gbesĩsĩ musu gbɛmpiki wewa. Taale kenné gbesĩsĩ pì pɔteũ ee à likadi piki, ndí onné an laakaika, an su an dede gbesĩsĩ piwao, an gbɛke su à ɔnawa feo. Gbɛ pɔ ɔnàwa, wà adee de. Wa su wà ɔna adeewao, wà a papa kũ gbèdo kó wà a zɔzɔ kũ kàdo wà de. Tibɔn ya, gbɛnesĩnan ya, àa gae. Tó an mà wà kuu pè wà a bà gàte, an na gbesĩsĩ pi seɛ.

Musa pita gbesĩsĩ piwa à mɔ à gbɛnɔ lè, à ònné an gbãsĩbo an gĩnanɛ an an pɔkasano pipi. À sùka à ònné: Akũ ku soodo gɔɔ aakɔde zĩ yã musu. Á su à wute kũ nɔgbèdoo. Pɔ gu dɔ a gɔɔ aakɔde pì zĩ, akũ legũ dá pũtã ada yɛme ke, mí legũ sisi gbesĩsĩ musu. Pɔ an kuu ó gbãa mà, akũ vĩa gbɛ pɔ ku bùaũnɔ kũ piki, andá lukpalukpa. Musa bùteńdo bùaũ, à gɛɛńdo Lua kĩa, akũ an

zè zĩte gbesĩsĩ pì sɛɛ. Tekuse kùte Sinai gbesĩsĩwa pɔ Deke pìtawa kũ tɛdo yãdi. Tekuse pì fète landõ mɔgatekpe tekuseba, mí gbesĩsĩ pì dá lukpalukpa piki. Kuu ó gbãa dá lafa. Pɔ Musa yã'ò, akũ Lua wène legũpũtãnaũ.

Deke pìta à zè Sinai gbesĩsĩ minanguaũ, à Musa sisi, akũ à dèdè à gèe gũ. Deke òne: Pita ò gbẽ pinɔ gba laakai, an su an vĩ taalela an mɔ an ma gwadio, pɔ an paida su an gagao yãdi. Baa sa'onna pɔ andi namanɔ, an gbãsíbo an gĩnanɛ, pɔ má su mà an dèdèo yãdi. Musa ò Dekene: Anda dèdèo, zaapɔ n wá gbá laakai n ò wà taale da gbesĩsĩ pì pɔtɛũ, i gɔ n pɔ ù. Akũ Deke òne: Pita ò Haluna sɛ ò mɔdo, esõ sa'onnanɔ kũ gbẽ kɔɔnɔdo su an vĩ taalela an mɔ ma kĩa, pɔ má su mà an dèdèo yãdi. Akũ Musa pìta à gèe gbẽnɔ kĩa, à yã pì ònné.

Deke yãdina men kwinɔ

Lua yã dinɔ ò piki à ò: Maakũɛ Deke á Lua, ma á búte zɔbenaũ Masa.

Á su àkũ deke ke vĩo, ma baasio.

Á su àdi peke taka ke à kute à zɔbenɛo, pɔ pɔ ku musu kó tɔɔte kó iũn dò, zaapɔ ma Deke á Lua, midi si sàkao. Mae pɔ ba yimadionɔ, mi an yã vãi wí an buinɔwa ee à ge pe an sĩwenanɔwa kũ an tububobonnanɔdo. Gbẽ pɔ yimadi an ma yãdinanɔ kũna sɔ, maakũ yĩndi ee an bui leũ.

Maakũ Deke á Lua á su àdi ma tɔ si pã, zaapɔ gbẽ pɔ ma tɔ sì pã, maa tó adee bo pã.

Àdi kāmabogɔɔ zī dō ma pɔ ũ. Àdi á bua zī kũ á zī pikido ke gɔɔ soodo, a soopiade díkũ deane kāmabozī ũ, zaapɔ ma Deke á Lua ma pɔɛ. Á su àdi zī ke ke gɔɔ pì zīo, aakũnɔ kó á nenɔgɔna kó á nenɔgbē kó á zīken nɔgɔna kó nɔgbē kó á tibɔ kó nibɔ pɔ ku á bewa. Zaapɔ gɔɔ soodo ma musu kũ ānuado kè kũ tekudo kũ pɔ pɔ kuúnɔdo piki, akũ ma kāmabò a gɔɔ soopiade pì zī. A yā mí tò ma balikakà kāmabogɔɔ piũ, má dì ma pɔ ũ.

Àdi bæna dō á de kũ á dadone, pɔ à le à gike b̀usu pɔ maakũ Deke á Lua máda kpaawaũ.

Á su àdi gbē deo.

Á su àdi wute kũ gbēke nadoo.

Á su àdi kpāi oo.

Á su àdi eke to á gbēdake yā musuo.

Á su àdi lukpa á gbēdake ɔ̀udio. Á su àdi lukpa a nadio kó a zīken nɔgɔna kó nɔgbē kó a zù kó a faaga kó pɔ pɔ a vīnɔdo piki.

Gbēmpiki legũ pūtāna mà kũ kuu'ɔdo, an yēmekena è kũ tekusedo dɔ gbesĩsĩ musu, akũ vīa an kũ, andá lukpalukpa, an ze zāu. An ò Musane: Yā owēa n gīna, wí ma. Su ò to Lua yā'owēao, pɔ wá su wà gagao yādi. Musa ònné: Á su à to vīa á kũo, zaapɔ á yōna yādi Lua m̀, pɔ à le àkũ a vīa vī, mí á su à duunakeo. An zena zāu, akũ Musa nà tekuse sɛɛ, gu pɔ Lua ku piũ.

Deke sa'okĩi yã

Akũ Deke ò Musane: Yã di o Isila'ilanɔne: Á gĩnawa a mà lapɔ ma yã'dane zaa musu. Á su à tãa ke à namao. Á su à suluba kó zĩnali pi tãanɔ ũo. À ma sa'okĩi bo kũ tẽnado, íkũ sa'owa kũ sãnɔdo kũ zunɔdo, sa pɔ wì a pɔ ka teũ à tekũ kũ saabukpa sa'obɔdo. Gu pɔ ma dìane àkũ ma tɔ sisiũ, maa mɔ á kĩa, mí balikakaaũ. Tó áda ma sa'okĩi pì bo kũ gbèdo, á su à bo kũ gbè zõenadoo, zaapɔ tó a gá pètewa, à sãnka kèn nu. Á su à ma sa'okĩi bo à a dèdekĩi keo, pɔ á punsi su à bowao yãdi.